

Skatterådimit najoqutassiaq

Pillugu: 1989-imiit iluanaarutisianit akileraarutit.

Aningaasarsianit akileraarutit pillugit Inatsisartut inatsisaata allannguutaatut Inatsisartut inatsisaatigut nr. 10 17. oktober 1988-imeersukkut iluanaarutisianit akileraarusiisarneq allanngortinneqarpoq, 1. januar 1989-imiit atuutilersussamik.

Piginneqatigiiffimmi aktieselskabimi, tamatumani ilaallutik piginneqatigiiffimmi anpartsselskabimi, Kalaallit Nunaanni ittutut nalunaarsorneqarsimasumi iluanaarutit, aktietigut iluanaarutit tunniunneqarnissaat imaluunniit iluanaarutigitinneqarnissaat aalajangerneqartillugu, sulii selskabi iluanaarutinit "iluanaarutinit akileraarutinit" akiliisinneqartassaaq.

Taamaattorli 1. januar 1989 aallarnerfigalugu "iluanaarutisianit akileraarutit" qangatuut Kalaallit Nunaat tamakkerlugu iluanaarutisianit akileraarummik assigiissumik procenteqartinneqassanngillat (1988-imi taanna 35 %-iusimalluni). "Iluanaarutisianilli akileraarutit" selskabip kommunitut akileraarfiani procentit akileraarusiissutit, iluanaarutisiaqartitsisoqarnissaanut aalajangernerup nalaani atuuttut, atorneqassapput.

Assersuutigalugu iluanaarutitsiat 1. maj 1989-imi tunniunneqartussatut aalajangerneqarsimappat, "iluanaarutisianit akileraarutit" tassaassapput piffissami tassani, tassa 1. maj 1989-imi, selskabip kommunitut akileraarfiata procentit akileraarusiissutai (nuna tamakkerlugu akileraarutit + kommunemut akileraarutit + kommunenut ataatsimut akileraarutit).

Assersuutigalugu 1. maj 1989-imi selskabip kommunitut akileraarfia tassaappat Aasiaat, "iluanaarutisianit akileraarutit" tassaapput nuna tamakkerlugu akileraarutit, kommunemut akileraarutit (Aasiaat) aammalu kommunenut ataatsimut akileraarutitip katinneqarnerat, piffissami tassani, tassa 1. maj 1989-imi atuuttut, tassa imaappoq qaammatsiutit malillugit ukiumi 1989-imi procentit akileraarusiissutit.

"Iluanaarutisianit akileraarutit" uninngatinneqartut, uani assersuummi qaammat ataaseq qaangiutsinnagu, tassa 1. juni 1989 nallertinnagu, Aasiaat kommuneanut akilerneqareersimassapput.

Siuliani taaneqartuni apeqqutaanngilaq selskabip qaammatsiutit malillugit ukioq naatsorsuutiminut ukiorineraa imaluunniit piffissaq alla ukiutut aningaasarsiorfittut atornissaanut immikkut akuerineqarsimanersoq.

Iluanaarutisianit akileraarutit sulii tassaajuarput akileraarutissaviit.